

四庫全書

史部

欽定四庫全書

史部

華陽國志卷

七上  
七下

詳校官編修臣李潢

侍讀臣孫球覆勘

總校官中書臣朱鈐

校對官助教臣胡予襄

謄錄監生臣崔堂

欽定四庫全書

華陽國志卷七

劉後主志

晉 常璩 撰

後主諱禪字公嗣先主太子甘夫人所生也襲位時年  
十七 建興元年夏五月後主即位尊皇后吳氏曰皇  
太后太赦改元於魏黃初四年吳黃武二年也 立皇  
后張氏車騎將軍張飛女也封丞相亮武鄉侯中護軍

李嚴假節加光祿勳封都鄉侯督永安事中軍師衛尉  
魯國劉琰亦都鄉侯中護軍趙雲江州都督費觀屯騎  
校尉丞相長史王連中部督襄陽向寵及魏延吳懿皆  
封都亭侯楊洪王謀等關內侯 南中諸郡並叛亂亮  
以新遭大喪未便加兵遣尚書南陽鄧芝固好於吳吳  
王孫權曰吾誠願與蜀和親但主幼國小慮不自存芝  
對曰吳蜀二國之地吳有三江之阻蜀有重險之固大  
王命世之英諸葛亮一時之傑合此二長共為唇齒進

可兼并天下退可鼎足而峙大王如臣服於魏魏則上  
望大王入朝其次求太子入侍若其不從則奉辭伐叛  
蜀必順流見可而進如此江南之地非復大王之有也  
吳王大悅與蜀和報使聘歲通芝後累往權曰若滅魏  
之後二主分治不亦樂乎芝對曰滅魏之後大王未深  
識天命者戰爭方始耳權曰君之誠懇乃至於此書與  
亮曰丁宏撥張陰化不實和合二國惟有鄧芝 二年  
丞相亮開府領益州牧事無巨細咸決於亮亮乃撫百

姓示儀軌約官職從權制盡忠益時者雖讐必賞犯法怠慢者雖親必罰服罪輸情者雖重必釋遊辭巧飾者雖輕必戮善無微而不賞惡無纖而不貶庶事精練物究其本循名責實虛偽不齒終乎封域之內畏而愛之刑政雖峻而無怨者以其用心平勸戒明也 辟尚書郎蔣琬及廣漢李邵巴西馬勲為掾南陽宗預為主簿皆德舉也秦宓為別駕犍為五梁為功曹梓潼杜微為主簿皆州俊彥也而江夏費禕南郡董允郭攸之始為主簿

侍郎贊揚日月 吳遣中郎將張溫來聘報鄧芝也將  
返命百官餞焉惟宓未往亮累催之溫問曰彼何人也  
亮曰益州學士者也及至溫問宓曰君學乎答曰五尺  
童子皆學何況小人溫曰天有頭乎在何方也宓曰詩  
云乃眷西顧知其在西又曰天有耳乎宓曰詩不云乎  
鶴鳴九臯聲聞于天若無其耳何以聽之又曰天有足  
乎曰詩不云乎天步艱難之子不猶若其無足何以步  
之又曰天有姓乎曰姓劉何以知之曰其子姓劉又曰

日生於東乎曰雖生於東終沒於西答問如響之應聲  
溫大敬服宓亦尋遷右中郎將長水校尉大司農 三  
年春長水校尉廖立坐謗訕朝廷改徙汶山立自荊州  
與龐統並見知而性傲侮後更冗散怨望故致黜廢  
三月亮南征四郡以弘農太守楊儀為參軍從行步兵  
校尉襄陽向朗為長史統留府事 秋南中平軍資所  
出國以富饒 冬亮還至漢陽與魏降人李鴻相見說  
新城太守孟達委仰於亮無已亮方北圖欲招達為外



援謂參軍蔣琬從事費詩曰歸當有書與子度相聞對  
曰孟達小子昔事振威不忠後奉先帝背叛反覆之人  
何足與書亮不答詩數率意而言故凌遲於世 十有  
二月亮至羣官皆道迎而亮命侍郎費禕參乘禕官小  
年幼衆士於是莫不易觀 四年永安都護李嚴還督  
江州城巴郡大城以征西將軍汝南陳到督永安封亭  
侯 是歲魏文帝崩明帝立 五年魏太和元年也春  
丞相亮將北伐上疏曰今天下三分益州疲弊此誠危

急存亡之秋也然侍衛之臣不懈于內忠志之士亡身於外者咸追先帝之遇欲報之陛下也先帝以臣謹慎故臨崩寄臣以大事受命以來夙夜憂歎故五月渡瀘深入不毛今南方以定兵甲以足當獎率三軍北平中原庶竭駑駘攘除奸凶克復漢室還乎舊都此臣所報先帝而忠於陛下願陛下託臣以討賊興復不効則治臣之罪以告先帝之靈陛下亦宜自謀諮諏善道察納雅言不宜引喻失義以塞忠諫之路也又曰親賢臣遠

小人先漢所以興隆昵小人疎君子後漢所以傾覆侍  
中郭攸之費禕侍郎董允先帝簡拔以遺陛下斟酌損  
益進盡忠言則其任也宮省之事悉以諮之必能裨補  
闕漏有所廣益也 以尚書南陽陳震為中書令治中  
張裔為留府長史與參軍蔣公琰知居府事 二月亮  
出屯漢中營沔北陽平石馬以鎮北將軍魏延為司馬  
六年春丞相亮揚聲由斜谷道取郿使鎮東將軍趙  
雲中監軍鄧芝據箕谷為疑軍魏大將軍曹真舉衆當

之亮身率大衆攻祁山賞罰肅而號令明天水南安安  
定三郡叛魏應亮關中響震魏明帝西鎮長安命張郃拒  
亮亮使參軍襄陽馬謖裨將軍巴西王平及張沐李盛  
黃襲等在前違亮節度為郃所破平獨歛衆為殿而雲  
芝亦不利亮拔將西縣千餘家還漢中戮謖及沐盛以  
謝衆奪襲兵貶雲秩長史向朗以不時臧否免罷超遷  
平參軍進位討寇將軍封亭侯統軍五月亮上疏曰臣  
以弱才叨竊非據親秉旄鉞以厲三軍不能訓章明法

臨事而懼至有街亭違令之闕箕谷不戒之失咎皆在  
臣臣授任無方春秋責帥臣職是當請自貶三等以督  
厥咎於是以亮為右將軍行丞相事辟天水姜維為倉  
曹掾加奉義將軍封當陽亭侯亮書與長史張裔參軍  
蔣琬稱維曰姜伯約西州上士馬季常李永南不如也  
冬亮復出散關圍陳倉糧盡還魏將王雙追亮亮合  
戰斬雙 七年春丞相亮遣護軍陳式攻武都陰平魏  
雍州刺史郭淮出將擊式亮自至建威淮退遂平二郡

後主詔策亮曰街亭之敗咎由馬謖而君引愆深自抑損重違君意聽順所守前年耀師馘斬王雙今歲授征郭淮遯走降集氏羌興復二郡威震凶暴功勲赫然復君丞相君其無辭 夏四月吳主孫權稱尊遣衛尉陳震慶問吳與蜀約分天下 冬城漢樂 八年春丞相亮以參軍楊儀為長史加綏遠將軍遷姜維護軍征西將軍 秋魏大將軍司馬宣王由西城征西車騎將軍張郃由子午大司馬曹真由斜谷三道將攻漢中丞

相亮軍城固表進江州都護李嚴驃騎將軍將二萬人  
赴漢中嚴初求以五郡為巴州書告亮言魏大臣陳羣  
司馬懿並開府亮乃加嚴中都護以嚴子豐為江州都  
督大雨道絕真等還丞相亮以當先北征因留嚴漢中  
署留府事嚴改名平 丞相司馬魏延將軍吳懿西入  
羌中大破魏後將軍費曜雍州刺史郭淮于陽溪延遷  
前軍師鎮西將軍封南鄭侯懿左將軍高陽鄉侯徙魯  
王永為甘陵王梁王理為安平王皆以魯梁在吳分故

也 九年春丞相亮復出圍祁山始以木牛運參軍王平守南圍司馬宣王拒亮張郃拒平亮慮糧運不繼設三策告都護李平曰上計斷其後道中計與之持久下計還住黃土時宣王等糧亦盡盛夏雨水平恐運漕不給書白亮宜振旅夏六月亮承平指引退張郃至青封交戰為亮所殺 秋八月亮還漢中平懼亮以運不辦見責欲殺督運領岑述驚問亮何故來還又表後主言亮偽退亮怒表廢平為民徙梓潼奪平子豐兵以為從



事中郎與長史蔣琬共知居府事時費禕為司馬也十年春丞相亮休士勸農車騎將軍劉琰與軍師魏延不和還成都秋早亮練兵講武十一年魏青龍元年也丞相亮治斜谷閣運糧谷口十二年春丞相亮以流馬運從斜谷道出武功據五丈原與司馬宣王對於渭南亮每患糧不繼使志不伸乃分兵屯田為久住之基耕者雜於渭濱居民之間百姓安堵軍無私焉秋八月亮疾病卒于軍時年五十四還葬漢中定軍山塚足

容棺歛以時服諡曰忠武侯鎮西大將軍魏延與長史楊儀素不和亮既恃延勇猛又惜儀籌畫不能偏有所廢常恨恨之為作甘戚論二子不感延常舉刃擬儀涕淚交流惟護軍費禕和解中間終亮之世盡其器用儀欲案亮成規將喪引退使延斷後姜維次之延怒舉軍先歸南鄭各相表反留府長史蔣琬侍中董允保楊儀疑延延道欲擊儀儀遣平北將軍馬岱討滅延延自以武幹常求將數萬別行依韓信故事亮不許以亮為怯

及儀將退使費禕造延延曰公雖亡吾見在當率衆擊賊豈可以一人亡廢國家大事乎使禕報儀不可故欲討儀儀率諸軍還成都大赦以吳懿為車騎將軍假節督漢中事初亮密表後主以儀性狷狹若臣不幸可以蔣琬代臣於是以琬為尚書令總統國事以儀為中軍師司馬費禕為後軍師征西姜維為右監軍輔漢將軍鄧芝前軍師領兗州刺史張翼前領軍並典軍政 廖立 在汶山聞亮卒垂泣曰吾終於左社矣李平亦發病

死初立平為亮所廢安奄沒齒常冀亮當自補復策後人不能故感憤焉十三年拜尚書令蔣琬為大將軍領益州刺史以費禕為尚書令時新喪元帥遠近危悚琬超登大位既無戚容又無喜色衆望漸服侍郎董允兼虎賁中郎將統宿衛兵軍師楊儀自以年官在琬前雖同為參軍長史已常征伐勤苦更處琬下書怨望謂費禕曰公亡際吾當舉衆降魏處世寧當落度如此邪令悔不可追禕表其言廢徙漢嘉儀又上書激切遂行儀

重辟 吳以亮之卒也增巴丘守萬人蜀亦益白帝軍  
右中郎宗預使吳吳主曰東之與西共為一家何以益  
白帝守預對曰東增巴丘之戍蜀益白帝之兵俱事勢  
宜然不足以相問也 十四年夏四月後主西巡至湔  
山登坂觀汶川之流武都氐王苻健請降將軍張尉迎  
之過期不至大將軍琬憂之牙門將巴西張嶷曰健求  
附欵至必無他變聞健弟狡不能同功各將乖離是以  
稽耳健弟果叛就魏健率四百家隨尉居廣都縣 十

五年魏景初元年也 夏六月皇后張氏薨謚曰敬哀  
是歲車騎將軍吳懿卒以後典軍安漢將軍王平領  
漢中太守代懿督漢中事 懿從弟班漢大將軍何進  
官屬吳匡之子也名常亞懿官至驃騎將軍持節鄉侯  
時南郡輔匡光弼零陵劉邕南和官亦至鎮南將軍潁  
川袁淋南郡高翔至大將軍淋征西將軍 延熙元年  
春正月立皇后張氏敬哀皇后妹也大赦改元立子璿  
為太子瑤為安定王以典學從事巴西譙周為太子家

令梓潼李謨為僕射皆名儒也 冬十二月大將軍琬  
出屯漢中更拜王平以前護軍署大將軍府事尚書僕  
射李福為前監軍領大將軍司馬 延熙二年春三月  
進大將軍琬大司馬開府辟治中從事犍為楊羲為東  
曹掾羲性簡琬與言時不應答羣吏以為慢琬曰夫人  
心不同各如其面從後言古人所戒羲欲贊吾是耶  
則非本心欲反吾言也則顯吾之非是以嘿然此羲之  
快也 督農楊敏常毀琬作事憤憤誠非前人也或以

白琬琬曰吾信不如前人主者白乞問憤憤狀琬曰苟其不如則憤憤矣復問何也後敏坐事下獄人以為必死琬心無適莫是以上下輯睦歸仰於琬蜀猶稱治

輔漢將軍姜維領大司馬是歲西征入羌中魏明帝崩齊王即位 延熙三年魏正始元年也安南將軍馬忠率越嵩太守張嶷平越嵩郡 四年冬十月尚書令費禕至漢中與大司馬琬諮論事計歲盡還 五年春正月姜維還屯涪縣大司馬琬以丞相亮數入秦川不克欲



順沔東下征三郡朝臣咸以為不可安南將軍馬忠自  
建寧還朝因至漢中宣詔旨于琬琬亦連疾動輒計還  
忠鎮南大將軍封彭鄉侯 六年太司馬琬上疏曰臣既  
闇弱加嬰疾疢奉辭六年規方無成夙夜憂慘今魏跨  
帶九州除之未易如東西犄角但當蠶食然吳期二三  
連不克果輒與費禕馬忠議以為涼州胡塞之要宜以  
姜維為涼州刺史銜持河右今涪水陸四通惟急是赴  
東北之便應之不艱 冬十月琬還鎮涪以王平為鎮

北大將軍督漢中事姜維鎮西大將軍涼州刺史 十  
有一月大赦遷尚書令費禕大將軍錄尚書事就遷江  
州都督鄧芝車騎將軍 七年閏月魏大將軍曹爽征  
西將軍夏侯玄征蜀王平白與護軍零陵劉敏距興勢  
圍以大司馬琬疾病假大將軍禕節率軍自成都赴漢  
中旌旗啓路人馬擐甲羽檄交馳嚴鼓將發光祿大夫  
義陽來敏求共圍棋禕留意博奕色無厭倦敏曰聊試  
君耳君信可人必能辦賊者也比至爽等退命鎮南大

將軍馬忠平尚書事夏四月安平王卒子胤嗣 秋九月  
裱還大司馬琬以病固讓州職于費裱董允於是裱  
加大將軍領益州刺史允加輔國將軍守尚書令允  
立朝正色處中上則匡主下帥羣司於時蜀人以諸葛  
亮將費及允為四相一號四英宦人黃皓便僻佞慧畏  
允不敢為非後主欲採擇允曰妃后之數不可過十二  
允常與典軍義陽胡濟大將軍裱共期遊宴命駕將出  
郎中襄陽董恢造允脩敬自以官卑年少求去允曰

本所以出者欲與同好遊談耳君以自屈方展濶積舍  
此就彼非所謂也命解驂止駕允之下士接物皆此類  
也君子以為有周公之德 八年秋皇太后吳氏薨諡  
曰穆 冬十有一月大將軍禕行軍漢中 九年夏六月  
禕還成都 秋大赦司農孟光於衆中責禕曰夫赦者偏枯  
之物非明世之所宜有也今主上賢仁百寮稱職有何  
旦夕之急數施非常之恩以惠奸邪之惡上犯天時下  
違人理豈具瞻之高美所望於明德哉禕但顧謝焉初

丞相亮時有言公惜赦者答曰治世以大德不以小惠故  
匡衡吳漢不願為赦先帝亦言吾周旋陳元方鄭康成間  
每見啟告治亂之道備矣曾不語赦也若景升季玉父子  
歲歲赦宥何益於治故亮時軍旅屢興赦不妄下也自亮  
歿後茲制遂虧 蜀初闕三司之位以待天下賢人其卿  
士皆勲德融茂大常杜瓊學通行修衛尉陳震忠厚篤粹  
孟光亮直著聞皆良幹也但光好指摘利病大長秋南陽  
許慈普記載籍典掌舊文光祿來敏荆楚名族東宮耆宿以

舉措不慎失勢事者指當世美名不及特進大常廣漢鐔  
承光祿勳河東裴雋也其朝臣尚書巴西司學義陽胡  
博僕射巴西姚弋仲侍中汝南陳祗並讚事業以故丞  
相長史向朗為左將軍朗自去長史優遊無事乃鳩合  
經籍開門誘士講論古義不豫世務是以上自執政下  
及童冠莫不宗敬焉冬十有一月大司馬琬卒諡曰  
恭侯中書令董允亦卒超遷蜀郡太守南陽呂乂為尚  
書令進姜維為衛將軍與大將軍禕並錄尚書事維出

隴西與魏將郭淮夏侯霸戰尅之 十年涼州胡王白  
虎文治無戴等率衆降魏將軍維徙之繁縣 汶山平  
康夷反維復討平之過見廖立意氣自若維還假節  
十一年鎮北將軍王平卒以中監軍胡濟為驃騎將軍  
假節領兗州刺史代平督漢中事平始出軍武不大知  
書性警朗有思理與馬忠並垂事績平同郡勾扶亦果  
壯亞平官至右將軍封宕渠侯後張翼與襄陽廖化並  
為大將故時人為語曰前有何勾後有張廖平本養外

家何氏後復姓 夏五月大將軍禕出屯漢中 十二年  
魏嘉平元年也魏誅大將軍曹爽右將軍夏侯霸來降  
淵子也拜車騎將軍四月大赦 秋衛將軍維出雍州  
不克將軍勾安李韶降魏 十三年衛將軍維復出西  
平不克而還 十五年吳主孫權薨子亮立來告赴之  
如古義也 立子琮爲西河王命大將軍禕開府  
尚書令呂乂卒以侍中陳祗守尚書令加鎮軍將軍  
十六年春正月朔魏降人郭脩因賀會手刃殺大將



軍費禕於漢壽謚曰敬侯禕當國名畧與蔣琬比而功業相繼雖典戎于外慶賞刑威咸咨於已承諸葛之成規因循不革故能邦家和壹自禕歿後閹宦并權衛將軍維自負才兼文武加練西方風俗謂自隴以西可制而有禕常裁制至是無憚屢出師旅功績不立政刑失錯矣 四月維將數萬攻南安魏雍州刺史陳泰救之維糧盡還 十七年魏正元元年也 春衛將軍維督中外軍事大赦 夏六月維復出隴西隴西狄道長李

簡舉縣降維圍襄武魏大將徐質救之維拔狄道河間  
臨洮三縣民入蜀居于綿竹及繁是歲魏帝齊王廢  
高貴鄉公即祚十八年春衛將軍維復議出征征西  
大將軍張翼廷爭以國小不宜黷武維不聽夏率車  
騎將軍夏侯霸及翼出狄道大破魏雍州刺史王經于  
洮西經衆死數萬經退保狄道城翼曰可矣不宜進或  
毀此成功為蛇畫足維必進魏征西將軍陳泰救狄道  
維退駐鍾題十九年魏甘露元年也春進衛將軍

姜維為大將軍 秋八月維復出天水至上邽鎮西大將軍胡濟失期不至大為魏將鄧艾所破死者衆士庶由是怨維而隴以西亦無寧歲 冬維還謝過引負求自貶削於是以維為後將軍行大將軍事 立子瓚為新平王大赦 二十年春大赦魏征東大將軍諸葛誕以淮南叛連吳魏分關中兵東下後將軍姜維復從駱谷出長城軍芒水與魏大將司馬望鄧艾相持 景耀元年維以誕破退還成都復拜大將軍 史官言景星見

大赦改元 官人黃皓與尚書令陳祗相表裏始豫政  
皓自黃門丞至今年為奉車都尉中常侍 姜維雖班  
在祗右權任不如蜀人無不追思董允者時兵車久駕  
百姓疲弊太中大夫譙周著仇國論言可為文王難為  
漢祖人莫察焉 征北大將軍宗預自永安徵拜鎮南  
將軍領兗州刺史以襄陽羅憲為鎮軍督永安事 吳  
大臣廢其主亮立孫休來告難如同盟也 大將軍維  
議以為漢中錯守諸圍適可禦敵不獲大利不若退據

漢樂二城積穀堅壁聽敵入平且重關鎮守以御大敵  
攻關不克野無散穀千里懸糧自然疲退此殄敵之術  
也於是督漢中胡濟却守漢壽監軍王含守樂城護軍  
蔣舒守漢城又於西安建威武衛石門武城建昌臨遠  
皆立圍守二年夏六月立子諶為北地王恂為新興  
王虔為上黨王以征西張翼為左車騎將軍領冀州  
刺史廣武督廖化為右車騎將軍領并州刺史時南郡  
閻宇為右衛大將軍秋八月丙子領中護軍陳祗卒

諡曰忠侯祇在朝上希主指下接閹宦後主甚善焉以僕射南鄉侯董厥為尚書令三年魏景初元年也秋九月追諡故前將軍關侯曰忠義侯車騎將軍張飛曰桓侯驃騎將軍馬超曰威侯軍師龐統曰靖侯後將軍黃忠曰剛侯是歲魏帝高貴鄉公卒常道鄉公即帝位四年春三月追諡故鎮軍趙雲曰順平侯冬十月大赦拜丞相亮子武鄉侯瞻中都護衛將軍遷董厥輔國大將軍與瞻輔政以待中義陽樊建守尚書令自

瞻厥用事黃皓秉權無能正矯者惟建特不與皓和好  
往來而祕書令河南郅正與皓比屋周旋皓從微至著  
既不憎正又不愛之官不過六百石常免於憂患 五  
年春正月西河王琮卒 大將軍維惡皓之恣擅啓後  
主欲殺之後主曰皓趨走小臣耳往者董允切齒五常  
恨之君何足介意維本羈旅自託而功效無稱見皓枝  
附葉連懼於失言遜辭而出後主勅皓詣維陳謝維誘  
皓求香中種麥以避內逼皓承白後主秋維出侯和為

魏將鄧艾所破還駐沓中皓協比閭宇欲廢維樹宇故  
維懼不敢還 六年春魏相國晉文王命征南將軍鄧  
艾鎮西將軍鍾會雍州刺史諸葛緒益州刺史師纂五  
道伐蜀大將軍姜維表後主求遣左右車騎張翼廖化  
督諸軍分護陽安關口及陰平橋頭黃皓信巫鬼謂敵  
不來啓後主寢其事羣臣不知 夏艾將入沓中會將  
向駱谷蜀方聞之遣張翼董厥為陽安關外助廖化為  
維援繼大赦改元炎興比至陰平聞諸葛緒向建威故



待月餘維為鄧艾所摧還陰平 鍾會圍樂城遣別將  
攻關分將蔣舒開門降督傅僉奮戰而死 冬會以樂  
城不下徑長驅而前翼厥之至漢壽也維化捨陰平還  
保劔閣拒會會不能尅糧運懸遠議欲還而鄧艾由陰  
平景谷傍入後主又遣都護諸葛瞻督諸軍距艾至漢  
涪不進尚書郎黃崇權子也勸瞻速行固險無令敵得  
入坪言至流涕瞻不從前鋒已破艾徑至涪瞻退保綿  
竹艾書誘瞻曰若降者必表封琅瑯王瞻怒殺艾使戰

予綿竹瞻軍敗績瞻臨陣死崇及羽林督李球尚書張  
遵皆必死沒命瞻長子尚歎曰父子荷恩不早斬黃皓  
以致敗國殄民用生何為乃驅馬赴魏軍而死百姓  
聞艾入坪驚迸山野後主會羣臣議欲南入七郡或欲  
奔吳光祿大夫譙周勸降魏魏必裂土封後主後主從  
之遣侍中張紹駙馬都尉鄧良齎璽綬奉牋詣艾降北  
地王譙恚憤殺妻子而後自殺艾至成都後主輦櫬  
面縛銜璧迎之艾親釋其縛受其璧焚其櫬承制拜驃

騎將軍使止其宮執黃皓將殺之受賂而赦之諸圍守  
皆奉後主勅令乃下姜維未知後主降謂且固城素與  
執政者不平欲使其知衛敵之難而後逞志乃迴由巴  
西出鄴五城會被後主手令乃投戈釋甲詣鍾會降于  
涪軍士莫不奮擊以刃斫石 明年春正月會構艾檻  
車見徵會圖異計竒維雄勇還其節益本兵謂長史杜  
預曰姜伯約比中州名士夏侯泰初諸葛公休不如也  
鄧艾亦謂蜀人曰姜維雄兒也會維每出同車坐同席

將至成都自稱益州牧以叛特維為爪牙欲遣維為前  
將軍伐中國維既失策又知會志廣教會誅北諸將諸  
將既死徐欲殺會盡坑魏兵還後主密書通後主曰願  
陛下忍數日之辱臣欲使社稷危而復安日月幽而復  
明魏太后崩會命將發喪因欲誅之諸將半入而南安  
太守胡烈等知其謀曉成都東門以襲殺會及維張翼  
後主太子璿等軍衆抄掠數日乃定三月後主舉家  
東遷洛陽丁亥封安樂縣公食邑萬戶賜絹萬疋奴

婢百人他物稱此兄弟子孫為郡都尉侯者五十餘人以譙周全國濟民封城陽亭侯秘書令郤正舍妻子隨侍後主相導威儀封關内侯於是尚書令樊建殿中督張通侍中張紹亦封侯劉氏凡得蜀五十年正稱尊號四十二年蜀郡太守王崇論後主曰昔世祖内資神武之大才外拔四屯之奇將猶勤而獲濟然乃登天衢車不輟駕坐不安席非淵明弘鑒則中興之業何容易哉後主無常之君雖有一亮之經緯内無䟽附之謀外

無爪牙之將焉可苞括天下也又曰鄧艾以疲兵二萬  
遠出江由姜維舉十萬之師案道南歸艾為成禽禽艾  
已訖復還拒會則蜀之存亡未可量也乃迴道之巴遠  
至五城使艾輕進徑及成都兵分家滅已自招之然以  
鍾會之智畧稱為子房姜維陷之莫至尅捷籌筭相應  
優劣惜哉愚以為維徒能謀一會不慮窮兵十萬難為  
制御美意播越矣

譔曰諸葛亮雖資英霸之能而主非中興之器欲以區

區之蜀假已廢之命北吞強魏抗衡上國不亦難哉似  
宋襄求霸者乎然亮政脩民理威武外振爰迄琬禕遵  
脩弗革攝乎大國之間以弱為強猶可自保姜維才非  
亮匹志繼洪軌民嫌其勞家國亦喪矣

華陽國志卷七



欽定四庫全書

華陽國志卷八

晉 常璩 撰

大同志

古者國無大小必有記事之史表成著敗以明懲勸稽  
之前式州部宜然自劉氏祚替而金德當陽天下文明  
不及曩世逮以多故族祖武平府君漢嘉杜府君並作  
蜀後志書其大同及其喪亂然逮在李氏未相條貫又

其始末頗有不詳第據往在蜀櫛沐艱難備諳諸故事更叙次顯挺年號上以彰明德下以治違亂庶幾萬分有益國史之廣識焉

魏咸熙元年蜀破之明年也以東郡袁邵為益州刺史隴西太守安平牽弘為蜀郡金城太守天水楊欣為犍為太守後主既東遷內移蜀之大臣宗預廖化及諸葛顯等並三萬家於東及關中復二十年田租董厥樊建並為相國參軍冬分州置梁州遣厥建兼散騎常

侍使蜀慰勞 晉泰始元年春刺史袁邵以治成將被  
徵故蜀侍郎蜀郡常忌詣相國府陳邵撫卹有方遠國  
初附當以漸導化不宜改易州將失遐外心相國聽留  
辟忌為舍人 冬十月晉武帝踐祚 二年春武帝弘  
納梁益引援方彥用故黃金督蜀郡柳隱為西河太守  
巴郡文立為濟陰太守常忌河內縣令 四年故中軍  
士王富有罪逃匿密結亡命刑徒得數百人自稱諸葛  
都護起臨邛轉侵江原江原方畧吏李高閭術縛富送

州刺史童策斬之初諸葛瞻與鄧艾戰於綿竹也時身死失喪或言生走深逃瞻親兵言富貌似瞻故富假之也 五年散騎常侍文立表復假故蜀大臣名勲後五百家不預廝劇皆依故官號為降 六年分益州南中建寧雲南永昌興古四郡為寧州 七年汶山守兵呂臣等殺其督將以叛族滅之初蜀以汶山西五郡北逼陰平武都故於險要置守自汶江龍鶴冉駝白馬匡用五圍皆置修屯牙門晉初以御夷徼因仍其守 八年

三蜀地生毛如白毫三夕長七八寸生數里 十年汶  
山白馬胡恣縱掠諸種夏刺史皇甫晏表出討之別駕  
從事王紹等固諫不從典學從事蜀郡何旅諫曰昔周  
宣王六月北伐者獫狁孔熾憂及諸夏故也今胡夷相  
殘戎虜之常未為大患而盛夏出軍水潦將降必有疾  
疫宜須秋冬圖之未晚晏不聽遂西行軍城比入麇入  
營中軍占以為不祥晏不悟胡康水子燒香言軍出必  
敗晏以為沮衆斬之 夏五月軍至都安屯觀坂上旅

復諫曰今所安營地名觀坂自上觀下反上之象徵不吉昔漢祖悟栢人以免難岑彭惡彭亡而不去遂陷於禍宜移營他所晏不納其言夜所將中州兵蔡雄宣班張儀等以汶山道險心畏胡之強晏復諫干時衆庶所怨遂引牙門張宏督張衡等反殺晏衆夜亂不知所為惟兵曹從事犍為楊倉彎弓力戰射百餘發且詈雄衆擊之矢盡見然從事廣漢王紹亦赴之死初晏未出蜀中傳相告曰井中有人學士靳普言客入東井東井益州

之分野憂刺史戒客人耳又有猛風是逆風其日觀卦  
用事若軍西行護觀坂門人向天井益可慮也故旅勲  
諫云卒如其言弘等遂誣表晏欲率已共反故殺之求  
以免罪其衆抄掠百姓廣漢主簿李毅白太守弘農王  
濬宜急救益州禍亂保晏無惡必為弘等所枉害濬從  
之而晏主簿蜀郡何攀以母喪在家聞亂釋纓經詣洛  
訴晏忠孝而弘等惡逆事得分明詔書因以濬為益州  
刺史加輕車將軍濬斬弘等益州平 咸寧三年春刺

史濬誅健為民陳瑞瑞初以鬼道惑民一道始用酒一  
斗魚一頭不奉他神貴鮮潔其死喪產乳者不百日不  
得至道治其為師者曰祭酒父母妻子之喪不得撫殯  
入弔及問乳病者轉奢靡作朱衣素帶朱幘進賢冠瑞  
自稱天師徒眾以千百數濬聞以為不孝誅瑞及祭酒  
袁旌等焚其傳舍益州民有奉瑞道者見官二千石長  
吏巴郡太守健為唐定等皆免官或除名 蜀中山川  
神祠皆種松栢濬以為非禮皆廢壞燒除取其松栢為



舟船惟不毀禹王祠及漢武帝祠又禁民作巫祀於是俗無淫祀之俗教化大行有木連理嘉禾黃龍甘露之祥三月被詔罷屯田兵大作舟船為伐吳計別駕何攀以為佃兵但五六百人無所辦宜召諸休兵借諸郡武吏并萬餘人造作歲終可成濬從之攀又建議裁船入山動數百里艱難蜀民冢墓多種松柏宜什四市取入山者少濬令攀典舟船器仗冬十月遣攀使詣洛表可征伐狀因使至襄陽與征南將軍羊祜荊州刺史

宋庭論進取計 四年春漢中都吏龔祚等謀殺太守  
姜宗以叛宗覺堅守祚等燒南鄭市及平民屋族誅刺  
史濟當遷大司農至漢壽重遣參軍李毅詣洛與何攀  
並表求伐吳 五年詔書拜濟龍驤將軍假節監梁益  
二州軍事除何攀郎中參軍事以典軍從事張任趙明  
李高徐兆為牙門姚顯却堅為督 冬當大舉秋攀使  
在洛安東將軍王渾表孫皓欲北侵請兵朝議征却須  
六年攀因表可因今取之策皓必不自送帝乃許焉

冬十有二月濬因自成都帥水陸軍及梁州三水胡七萬人伐吳臨發斬牙門將李延所愛待將也以爭騎斬衆莫不肅至江州詔書進濬平東將軍都督二州巴東監軍唐彬及平南軍皆受指授別遣參軍李毅將軍由涪陵入取武陵會巴陵 太康元年春三月吳平攀毅以下功封各有差以淮南胡罷為益州刺史濬遷輔國將軍 初濬將征問靳普今行何如普對曰客星伏南斗中而太白歲星在西方占曰東方之國破必如志矣

普學術不貪榮貴卒於布衣 三年更以益梁州為輕  
車刺史乘傳奏事以蜀多羌夷置西夷府以平吳軍司  
張牧為校尉持節統兵州別立治西夷治蜀各置長史  
司馬 五年罷寧州諸郡還益州置南夷校尉持節如  
西夷皆舉秀才廉良 八年武帝子成都王穎受封以  
蜀郡廣漢犍為汶山十萬戶為王國易蜀郡太守號為  
成都內史 元康六年復以梁益州為重州遷益州刺  
史栗譏為梁州加材官將軍揚烈將軍趙廞為益州刺

史加折衝將軍 關中氐及馬蘭羌反寇天水畧陽扶  
風始平武都陰平發梁州及東羌鎮西討之不克益州  
遣牙門馬玄尹方掾援之以鹿車運成都米給軍糧

八年獻至州雖崇簡約而性實奢泰畧陽天水六郡民李  
特及弟庠閼貳趙肅何巨李遠等及氐僂青叟數萬家  
以郡土連年軍荒就穀入漢川詔書不聽入蜀益州勅  
關禁之而戶曹李苾開關放入蜀布散梁州及三蜀界  
汶山興樂縣黃石北地盧水胡成豚堅安角成明石等

與廣柔平康文降劉紫利羌有讎遂與蜂蛔羌郅逢等數千騎劫縣令求助討紫利太守楊邠捷殺豚堅而降其餘類餘類遂叛殺長史 冬西夷校尉西平麴炳表出軍遣牙門將孫眺為督護萬人征之戰于常安大為胡所破 九年炳以敗軍徵還晉 夏用江夏太守陳總為代胡退散 永康元年詔徵刺史廡為大長秋遷成都內史中山耿滕為益州刺史折衝將軍因廡所服佩初廡以晉政衰而趙星黃占曰星黃者王陰懷異

計蜀土四塞可以自安乃傾倉賑施流民以收衆心以  
李特弟庠衛六郡人勇壯厚卹遇之流民恃此專為劫  
盜蜀民患之滕數密表流民剛戇而蜀人懦弱客主不  
能相制宜移還其本土不者與東三郡隘地觀其情態  
漸不可長將移秦雍之禍於梁益矣又言倉庫虛竭無  
以應鋒鏑之急必益聖朝西顧之慮由是歛惡滕州被  
詔書已遣文武士千餘人迎滕滕以歛未出州故在郡  
歛募庠黨羅安王利等劫滕大敗於廣漢宣化亭殺傳

詔者滕議欲入州城功曹陳恂諫曰今州郡竝治兵怨  
邁日深入城必有大禍不如安住少城檄諸縣合村保  
以備秦氏陳西夷行至且觀其變不爾可退住犍為西  
渡江原以防非常滕不從冬十有二月滕入城登西  
門歛遣親近代茂取滕茂告之而去歛又遣兵討滕  
滕軍敗績自投少城上吏左雄負滕子竒依民宋寧藏  
歛購千金寧不出尋歛敗得免郡吏皆竄走惟陳恂面  
縛詣歛請滕死喪歛義而不殺也恂與戶曹掾常敞共



備棺塚葬之。廡又遣軍逆陳總總至江陽聞廡有異志主簿趙模進曰今州郡不協必生大變惟當速行府是兵要助順討逆莫有動者也總更緣道遲留至南安魚涪津以與廡軍遇白總散財貨募士卒距戰若克州軍則州可得不克順流而退必無害也總不能更曰趙益州忿耿侯故殺之與吾無嫌何為如此模曰今州起事必當立威雖不戰無益也言至垂涕總不聽衆弛總逃草中模衣總服格戰廡兵殺模見非總乃搜求總殺

之歟自稱大將軍益州牧以武陽令蜀郡杜淑別駕張  
粲巴西張龜西夷司馬龔尼江原令捷為費遠等為左  
右長史司馬參軍徙捷為太守李庠為威寇將軍召  
臨邛令涪陵許弇為牙門將召諸王官莫敢不往又以  
廣漢太守張微汶山太守楊郃成都令費立為軍祭酒  
時庠與兄弟流驤妹婿李含天水任回上官惇扶風李  
攀始平費他氐苻成隗伯董滕等四千騎在北門廡使  
庠斷北道庠素東羌良將曉軍陳不用麾幟舉矛為行

伍庠勸稱大號漢庠部陣齊整廡等忌之遂於會所斬  
庠及其兄子弘等十餘人慮特等為變又命為督將安  
慰其軍還特庠喪其夜特流徹衆散歸綿竹廡遣故陰  
平令張衡升遷費恕就綏納皆為特所殺許弇求為  
巴東監軍杜淑張粲固執不許弇怒於州閣下手刃殺淑  
粲即亦殺弇二子廡腹心也永寧元年春正月廡遣  
萬餘人斷北道次綿竹以長史費遠為繼前軍宿石亭  
特等相合得七千餘人夜襲之因放火殺廡軍畧盡進

成都城中忪懼中郎常美與贊遠李泌張徵等夜斬關  
委歛走文武散盡歛獨與妻子乘小船順水至廣都為  
下人朱竺所殺 趙歛字和叔本巴西安漢人也祖世  
隨張魯內移家趙趙王倫器之歷長安令天門武陵太  
守來臨州長子曷在洛亦見誅 特流至成都殺西夷  
護軍姜發及龔尼成都令袁治因大抄掠遣牙門王角  
李基詣洛表狀初梁州刺史羅尚聞歛反表歛非雄才  
又蜀人不願為亂必無同者事終無成敗亡可計日而

侯惠帝因拜尚平西將軍假節領護西夷校尉益州刺史給衛節兵一千梁州兵二千又配上庸都尉義歆千五百人合四千五百人遷梓潼太守樂陵徐儉為蜀郡太守揚烈將軍隴西辛冉為廣漢太守羅尚又表請牙門將王敦兵七千餘人入蜀特等聞尚來甚懼使弟驤奉迎特厚進寶物尚以驤為騎督特流奉牛酒勞尚於綿竹王敦說尚曰特等隴上塞盜劫賊期無後患宜因會所殺之辛冉本趙王倫所用非資次召當還欲討厥以

自新亦言之尚不納冉又謂特曰故人相逢不吉當凶  
特自猜懼三月尚至州治汶山羌反於都安之天拭山  
遣王敦討之殺數千人大沒女弱為生口敦單馬馳為  
羌所殺御史馮該張昌攝秦雍州從事督郵移還流  
民從者萬餘家而特兄輔素留鄉里託言迎家既至蜀  
因謂特曰中國亂不足還遣天水閭式累詣尚求弛領  
校權停至秋並進貨賂於尚該許之及秋又求至冬辛  
冉李苾以為不可必欲移之式為別駕杜弢說逼移利

害弢亦欲寬迸民一年辛冉李苾以為不可尚從之弢  
致秀才板出還家知計謀不行故也 時有白虹頭在  
井里尾在東山拖大城上治中從事巴西馬休問閻式  
曰此何祥也式曰占言下有萬屍氣甚迫於城非佳應  
天孽尚可違乎平西若能寬迸民災自消矣冉苾又白  
尚流民前廡亂際多所枉沒宜因移設關以奪取 秋  
七月尚移書梓潼所在抱關 八月關皆城閻式曰無  
寇而城讎必保之蜀將亂矣 九月遣軍軍綿竹揚言

種麥實備越逸冉又購特沅首百疋特驤悉更其購云  
能送六郡大姓閭趙任楊李上官及氐僂梁竇符隗董  
費等首百疋流民本無還意大驚駭趣特 冬十月特  
流乃保赤祖為二營特稱鎮北益州流鎮東皆大將軍  
兄輔驃騎弟驤驍騎特長子蕩鎮軍少子雄前軍李含  
西夷校尉含子國離及任回上官晶李攀費他皆將軍  
以天水任臧上官惇楊褒楊發楊珪王達麴歆陰平李  
遠武都李搏略陽夕斌等參佐而閭式何巨趙肅亦為



賓從其餘皆有官號辛冉遣護軍曾元攻之為特所殺  
尚遣督護田佐牙門劉竝助冉復敗進圍廣漢尚復遣  
捷為太守李苾長史費遠助冉不能克冉託罪於綿竹  
令南郡岐苞斬之而潰圍走德陽特等得廣漢詐為表  
奏稱引梁統推舉竇融故事以自貴大尚書檄告喻閭  
式式答曰辛冉傾巧杜景狂發曾元小豎田佐血氣不  
治李叔平才經廊廟無將帥之氣討羸乏羌謂可長爾  
式前為節下及杜景文論留徙之宜人懷桑梓孰不願

之但流初至隨穀庸債一室五分復值雨潦乞須冬熟而不見聽必窮鹿抵虎但恐繩之大過逆民不肯延頸受刀其憂在後即聽武言寬使治嚴不過去九月盡集十月生進道令達鄉里何有如此也雅聽未察卹彼過言今辛冉奴亡叔平長遯支分勢解事漸及己所謂不寤曲突遠薪而有焦爛之客也尚率其民盡渡郾水以南尚阻長圍自都安至犍為七伯里押特等保廣漢大安元年春尚牙門夏匡攻李特於立石失利征西遣督

護衙博西征討特博次梓潼晉復拜前廣漢太守張微  
廣漢太守據德陽 尚遣督護巴西張龜督四十牙門  
軍繁城博方遣參軍蒙紹誘特降尚貽博書曰昔年得  
李流賤降心款款由時威帖得還為寇聞特委誠於下  
吏而流驤七八千人來寇日至姦凶之態詭譎不測不  
可不重以持之也博不從故為特所破於陽沔梓潼太  
守張演委倉庫走巴西巴西郡丞毛植五官襄班舉郡  
降特 衙博才兼文武征西大將軍河間王深器之初

為陰平太守為從事巴郡毛扶所免怨梁州人及西征  
征西許雄以陽沔之沒寇尚未至聞鶴鳴便退博欲委  
罪梁州託以自不供給梁州治中表之博以是得罪晉  
乃更用許雄為梁州刺史 八月特破德陽流次成都  
北上李驤在毗橋尚遣將張興偽降於驤覘士衆還以  
告尚尚遣叟兵襲驤破之流驤并衆攻尚軍軍失利喪  
其器甲 梁州刺史許雄數遣軍討特特備嶮不得進  
征西乃遣監軍劉沈將西征以中國有事不果而南夷

校尉李毅遣叟兵助尚軍數挫特勢日盛 二年春正  
月朔特攻尚水上軍特從盤底渡黨徒從赤水渡入郫  
及水西南緣江守軍皆散走太守徐儉逼降尚保大城  
特營少城而流軍江西之檢上蜀民先已結村堡特分  
人就主之雄書諫特收質任無得分散猛銳流亦諫之  
特怒曰大事以定但當安民何緣疑動而劫害不止尚  
從事蜀郡任叡說尚曰特既凶逆侵暴百姓又分人衆  
散在諸村堡急慌無備殆天亡特之秋也可告諸村密

尅戰日內外擊之破特必矣尚從之夜縋出叡使宣旨告諸村期二月十日同時討特手書隱語曰在彼楊水叡先詣特降究觀虛實特問城中叡曰米穀已欲盡但有貨帛耳因求省家特與啓信諸村悉從叡叡還報尚如期出軍討特諸村亦起大殺特衆破退追及於繁之官桑斬特及兄輔遠等李流歛餘衆還赤祖尚乘勝但施遊軍征盪傳特首洛陽焚其屍李雄以李離為梓潼太守衆還赤祖推流為大將軍大都督而荊州刺史

宋代水軍三萬助尚次墊江前鋒建平太守孫阜破特  
德陽守將蹇碩太守任臧徑至涪 三月尚遣督護張

龜何冲左汜等軍繁城而綿竹降涪陵民藥紳杜阿應  
尚尚又遣督護常深軍毗橋為流驤禦蕩雄攻紳深破  
驤殺李攀弟恭復為主左汜黃閭逼攻特北營營中氐  
羌因苻成隗伯石定叛應汜閭攻蕩雄蕩毋羅擐甲略  
陳伯手刃羅傷目壯氣益烈又時成伯戰於內汜閭攻  
其外自晨至日中營垂欲破會流破深蕩雄破紳還適

與汜閭會大破之成伯將其黨突出詣尚蕩策馬追退  
軍為叟長矛所搥死羅雄秘不發喪以安衆心流以特  
蕩死而岱阜並至恐懼李含勸流降流從之雄與驤諫  
之不納遣子世及含子胡質於阜李離聞父舅將降  
自梓潼還欲諫不及雄與離謀襲阜曰若功成事濟當  
為人主要三年一更雄曰與君計雖定老子不從若何  
離曰當制之若不可便行大事雖君叔勢不得已老父  
在君夫復何言雄乃說六郡人士激以尚之自侵懼以



并殘蜀民之禍陳阜可富貴之秋得以破阜阜軍死者甚衆而岱病亡荊州軍退轉攻尚 流慙其短軍事任雄雄數破尚軍保大城 夏四月尚殺隱士劉敞敞故州牧劉璋曾孫也隱居白鹿山高尚皓首未嘗屈志亦不預世事尚信妖言殺之殺之日雷震天大雨城中出水五月李流降于孫阜遣子為質不可乃舉兵與李離襲阜阜軍敗績宋岱病卒墊江州軍退雄逼攻尚尚保大城中 六月雄從帛羊頽渡攻殺汶山太守陳圖據郫

城 秋七月朔雄入郾城流盡移營據之三蜀民流迸  
南入東下野無煙火鹵掠無處亦尋飢餓唯涪陵民千  
餘家在江西依青城山處士范賢自守 平西參軍涪  
陵徐輿求為汶山太守撫帥江西民與官犄角討雄尚  
不許輿怨之求使江西因叛降雄以為安西將軍給其  
軍糧雄得以振 九月流病死雄復稱大將軍都督州  
牧尚數攻郾雄使武都朴泰譎尚曰李驤與雄以飢餓  
孤危日鬪爭相咎驤欲將民江西食穀若潛軍來我為

內應可得也尚以為然大與金寶泰曰今事故未立效  
後取不晚也又求遣人自隨覘伺尚從之泰要發火遣  
隗伯諸軍攻郾驤使道設伏以長梯上伯軍伯軍見火  
起皆爭緣梯雄因放兵擊之大破尚軍雄徑追退夜至  
城下稱萬歲曰以得郾城矣入少城尚乃覺保大城驤  
別攻犍為斷尚運道獲太守武陵龔恢恢往為天水西  
縣令任回為吏回問曰識故吏不恢曰識汝耳郡吏星  
散惟功曹楊渙侍衛回謂曰卿義人也吾力恐不能拔

龔君不能免卿也宜早去渙曰背主求生何如守義而

死遂并見殺

原闕

以李漣為獫為太守雄生獲伯知其傷

死創也伯女為梁雙妻為己用故不殺 閏十二月尚

糧運不繼而被攻急夜退由牛鞞水東下留牙門羅特

持城終夜比雄覺去以遠倉卒失節鉞羅特從後得之

并獲資應雄得成都 梁州刺史許雄以討賊不進檻

車徵詣詔獄惟護軍與漢國太守杜孟治都戰帥趙汶

荊州太守梓潼

疑闕

守漢中

元興元年春正月尚至江陽

軍司辛寶詣洛表狀詔書權統巴東巴郡涪陵三郡供  
其軍賦 冬尚移屯巴郡遣軍掠蜀中斬雄從祖冉獲  
驤妻咎子壽兄弟十二月雄太尉李離伐漢中殺戰帥  
趙汶 永嘉元年春尚施置關戍至漢安熨道時益  
州民流移在荆湘州及越雋牂柯尚書置郡縣就民  
所在又施諸村參軍 三月關中流民鄧定荀氏等掠  
漢中冬辰勢以叛巴西太守張燕帥牙門武肇漢國郡  
丞宣定遣兵圍之氏求掠於李雄夏五月雄遣李離李

雲李璜李鳳入漢中救定杜孟治聞離至命燕釋圍保  
州城初燕攻定定衆飢餓僞降送金一器與燕燕納之  
居七日氐至定還冬辰勢燕進圍之不聽孟治言離至  
先攻肇營營破次攻定又破之燕懼戰將百騎走離等  
大破州軍牙門蔡松退告孟治曰州軍以破賊衆不可  
待也孟治怖護軍欲城守謂孟治曰賊來雖衆客氣之  
常李區區有東南之逼必不分宿兵於外不過迎拔定  
氐耳孟治曰不然雄冒稱帝王縱橫天下以遣重衆必

取漢中雖有牢城士民破膽不可與待寇也乃開門退

走護軍北還孟治入大桑谷民數千家車數千兩一夜

行才數十里而梓潼荆子

疑字有悞

以父與孟治有隙合子

弟追之及於谷口孟治棄子走荆子獲之及吏民千餘

家惟漢國功曹母建荷檐仗曰吾雖不肖一國大夫國

亡不能存終不屬賊也餓死谷中積十餘日離等引還

漢中民句方白落率吏民還守南鄭二年詔書錄

尚討特功加散騎常侍都督二州進爵夷陵侯長子宇

以佩奉車都尉拜次子延壽騎都尉梁州以雄所破  
壞晉更以皇甫商為梁州商不能之官更用順陽內史  
江夏張光為刺史治新城漢中民逼李鳳寇掠東走  
荆沔三年冬天水荀琦張金苟略陽羅養殺雄大尉李  
離降尚雄大傅驤李雲李璜攻養為所破殺雲璜雄從  
弟也為司空十有二月琦等送離母子於尚尚斬之  
分其室四年天水文石殺雄太宰李國以巴西降尚  
梓潼巴西還屬初巴西譙登詣鎮南請兵鎮南無兵



表為揚烈將軍梓潼內史義募三巴蜀漢民為兵克復  
州郡先征宕渠殺雄巴西太守馬脫還住涪折衝將軍  
張羅進據犍為之合水巴蜀為語曰譙登治涪城文石  
在巴西張羅守合水巴氏那得前 秋七月尚薨于巴  
郡尚字敬之一名仲字敬真襄陽人也歷尚書丞郎武  
陵汝南太守徙梁州臨州 詔書除長沙太守下邳皮  
素秦混為益州刺史兼西夷校尉揚烈將軍領義募人  
及平西將軍當進治三關時李驤急攻譙登素次巴東

勅平西將軍張順楊顯拔登尚子宇恚恨加登糧運不  
給素至涪欲治執事執事懷懼冬十有二月素至巴  
郡降人天水趙攀閭蘭等夜煞素素字泰混下邳人也  
建平都尉暴重煞宇及攀巴郡亂不果拔登三府官屬  
上巴東監軍冠軍將軍南陽韓松為刺史校尉治巴東  
五年春正月李驤破涪城獲登巴西梓潼復為雄有  
荆湘有亂氐符成隗文作亂宜都西上巴東雄衆攻  
犍道走犍為太守魏紀殺江陽太守姚襲二月氐隗文

等反於巴東暴重討之未下重殺刺史韓松松字公治  
南陽人隗文司徒暨孫也自領三府事 三月三府文  
武與巴東太守吏共囚重及妻子於宜都殺之共表已  
郡太守張羅字景治行三府事羅治枳自討隗文於宮  
圻破降之旬月復叛劫巴郡太守黃龕託以為主龕窮  
急自殺主簿楊預諫曰文之宿惡江川所知拘劫明府  
誰不危心虛假之名孰當信之可使張將軍知其丹誠  
何遽如此龕曰賊已道斷何緣得令景治知之預乃作

龔書遣弟逃氏詣羅羅曰子宣宣誠吾自明之耳隗文  
聞怒囚龔執預問遣信狀龔曰不遣也文乃考預一日  
夜預不言文欲殺龔預死杖下文義之赦龔羅遣軍討  
之破還羅自討之敗績身死羅字景治河南梁人也巴  
中無復餘種矣文驅略吏民西上降雄將任回獲犍為  
太守魏紀三府文武共表平西司馬王異行三府事又  
領巴郡太守梁州刺史張光復治漢中 六年龍驤將  
軍江湯太守犍為張啓與廣漢羅琦共煞異異字彥明

蜀人也啓復行三府事羅琦行巴郡太守啓病亡啓字  
進明捷為人蜀車騎將軍張翼孫也三府文武復共表  
涪陵太守義陽向沈行西夷校尉吏民南入涪陵建  
興元年春沈卒涪陵多疫癘蜀郡太守江陽程融宜都  
太守健為楊芬西夷司馬巴郡常歆都安令蜀郡常倉  
弘等共推汶山太守涪陵蘭維為西夷校尉時中原  
既亂江東有事揀援無所顧望融等共率吏民北出枳  
欲下巴東遂為雄將李恭費黑所破獲五月梁州刺史

張光討王如黨涪陵李運巴西王建於盤蛇便作山疑其欲叛也運建走保拘山光遣軍攻破煞之建女贅楊虎保黃金山以叛討之虎夜棄營還趣厄水去州城四十里住光遣其子孟萇討之迭有勝負光求助於武都氐王楊茂搜虎亦求掾於茂搜初茂搜子難敵遣養子適賈梁州私買良人子一人光怒鞭殺之難敵以是怨光曰使君初來大荒之後兵民之命仰我氐活氐有小罪不能貫也陰謀討光會光虎求掾 秋八月茂搜

遣難敵將騎入漢中外言助光內實應虎至州城下光以牛酒饗勞遣與孟萇共討虎孟萇自處前難敵繼後與虎戰久難敵從後擊孟萇大破生禽孟萇殺之九月光恚死州人共推始平太守胡子序領州冬十月虎與氐急攻州城子序不能守委城退走氐虎得州城發光塚焚其屍喪難敵得光鼓吹妓樂自號刺史虎領吏民入蜀漢中民張咸等討難敵難敵退還咸復入蜀於是三州沒為雄矣蜀自太康至于太安頻怪異成

都北鄉有人嘗見女子僻入草中往視物如人有身形  
頭目口無手足能動搖不能言廣漢有馬生角長大各  
半寸又有驢無皮毛袒肉飲食數日死繁什邡郫江原  
生草高七八尺莖葉赤子青如牛角內史耿滕以為朱  
草表美於成都王元康三年正月中歟一夜有火光地  
仍震童謠曰郫城堅盡底穿郫中細子李特細又曰江  
橋頭闕下市成都北門十八字及尚在巴郡也又曰巴  
郡葛當下美巴郡皮素之西上也又曰有客有客來侵



門陌其氣欲索武平府君云譙周言巴沒三十年後當有異人入蜀蜀由之亡蜀亡之歲去周三十三年又曰宋岱不死則孫阜不交市三旬之間流雄之首懸於轅門愚以為宋岱方進阜見得質及更推敗設岱生在無所保據矣杜弢自湘中與柳監軍書曰前諸人不能寬李特一年又不以徐士權為汶山太守而屯故如此謂失之毫釐差以萬里斯言有似然必以不杜漸為恨者流民初西當承詔書閉關不入其次易代趙廞選宜內

遣平西綿竹之會聽王敦之計少可以寧毫釐之覺非  
彼之謂也

譔曰先王規方萬國必兼親尊賢能而任宗盟者蓋內  
藩王室外禦叛侮故元牧有連率之職奉貢無失職之  
愆奚及漢氏部州必卿佐之才郡守皆台鼎之望是以  
王尊王褒著名前世第伍倫蔡茂徑登三司斯作遠之  
準格不凌之令範也自大同後能言之士無不以西土  
張曠為憂求王皇宗樹賢建德于時莫察視險若夷缺

垣不防任非其器啓戎長寇遂覆三州詩所謂四國無  
正不用其良也

華陽國志卷八

欽定四庫全書

華陽國志卷九

晉 常璩 撰

李特雄壽勢志

李特字玄休略陽臨渭人也祖世本巴西宕渠實民種  
黨勁勇俗好鬼巫漢末張魯居漢中以鬼道教百姓實  
人敬信值天下大亂自巴西之宕渠移入漢中魏武定  
漢中曾祖父虎與杜朴胡約楊車李黑等移于略陽北

土復號曰巴人 特父慕為東羌獵將特兄弟五人長  
兄輔字玄政次特特弟庠字玄序庠弟流字玄通流弟  
驤字玄龍皆銳驍有武幹特長子蕩字仲平好學有容  
觀少子雄字仲儁初特妻羅氏夢雙虹自門昇天一虹  
中斷羅曰吾二兒若有先亡在者必大貴雄少時卒冉  
相當貴有劉化者道術士也言關隴民皆當南移李氏  
子中惟仲儁天姿奇異終為人主鄉里人多善之與叔  
父庠並以烈氣聞人多歸之既克成都衆皆飢餓驤乃

將民入鄆王城食穀芋 雄遣信奉迎范賢欲推戴之  
賢不許更勸雄自立 永興元年冬十月楊褒楊珪共  
勸雄稱王雄遂稱成都王追尊曾祖庸曰巴郡公祖父  
慕隴西王父特景王母曰太后追謚世父輔齊烈王仲  
父庠梁武王仲父流秦文王兄蕩廣漢壯文公以叔父  
驤為太傅庶兄始為太保外兄李國為太宰國弟離為  
太尉從弟雲為司徒璜為司空閻式為尚書令褒為僕  
射發為侍中珪為尚書洪為益州刺史徐興鎮南王達

軍師具置百官下赦建元太武迎范賢為丞相從弟置  
流子也以不陪列誅之賢既至尊為天地太師封西山  
侯復其部曲軍征不預租稅皆入賢家賢名長生一名  
延久又名九重一曰支字元涪陵丹興人也 光熙元  
年雄稱皇帝改元晏平 永嘉三年羅義荀琦等殺李  
離於梓潼時閻式去雄依離并見殺驤攻不克時李雲  
李璜皆戰死 明年文碩殺李國以巴西梓潼為晉平  
寇將軍李鳳在晉壽 梁州先已為雄所破不守而譙



登在涪平西參軍向奮屯漢安之宜福張羅屯平無逼  
雄雄將張寶弟全在司琦中雄遣寶反為奸許以代離  
寶素凶勇先殺人而後奔梓潼密結心腹會羅尚遣使  
慰勞琦琦等出送其使寶從後閉城門琦等奔巴西雄  
得梓潼拜寶為太尉雄自攻奮奮走遣驤攻登登初將  
驤子壽欲以誘驤被攻急救援不至還驤壽 五年春  
驤獲登遣李始督李鳳攻巴西殺文碩是歲雄姨弟任  
小受張羅募手刃雄頭雄幾死改元玉衡是後扶風鄧

芝楊虎等各率流民前後數千家入蜀以鳳為征北梁  
州任回鎮南南夷寧州李恭征東南蠻荊州皆大將軍  
校尉刺史雄驤勤卹百姓於內鳳回恭招流民於外稱  
有功氏符成隗文既降復叛手傷雄母及其來也咸釋  
其罪厚加待納皆以為將天水陳安舉隴右來降武都  
氏王楊茂搜奉貢稱臣杜弋自湘州使使求援晉涼州  
刺史張駿遣信交好漢嘉夷王沖遣子入質頃之朱提  
審炤率民歸降建寧爨量蒙嶮委誠其餘附者日月而至

雄乃虛已受人寬和政役遠至邇安年豐穀登乃興文教立學官其賦民男丁壹歲穀三斛女丁一斛五斗疾病半之戶調絹不過數丈綿不過數兩事少役稀民多富實至乃閭門不閉路無拾遺獄無滯囚刑不濫及但為國威儀無則官無秩祿職署委積班序無別君子小人服章不殊貨賄公行懲勸不明行軍無號令用兵無部伍其戰勝不相讓敗不相救攻城破邑動以虜獲為先故綱紀莫稱李鳳在北數有戰降之功時蕩子稚

屯晉壽害其功 大興元年鳳以巴西叛驤討之久住梓潼不敢進雄自至涪驤遂斬鳳以壽代鳳以知州征事 二年驤伐越巂又分伐朱提 三年獲太守西夷校尉李釗 夏進伐寧州大敗於螳螂還 初氐王楊茂搜子難敵堅頭為劉曜所破奔晉壽晉壽守將李稚蕩第二子也受其賂遺不送成都曜既引還稚遣難敵兄弟還武都遂即叛稚稚悔失計連白雄求伐氐雄許之羣臣多諫雄不從遣稚兄瑤以侍中中領軍統稚攻

難敵由白水道壽遣與稚弟珩由陰平入二道討氐難敵等先拒壽珩壽不進而瑯稚徑至下辨以深入無繼大為氐所破稚瑯皆死死者千餘人雄深自咎責以謝百姓瑯蕩之元子有名望志尚雄欲傳以後嗣甚痛惜之 雄妻任無子養瑯弟班為子雄自有庶子十五人羣臣上立嗣雄曰孫仲謀割有江東伯符基兆子止侯爵國志恥之宣公舍子立弟君子以為知人吾將彌縫國志之恥以繼宣公之美驤與司徒王達諫以為不

可雄不從 永昌元年冬立班為太子驤泣曰亂始於是矣 泰寧元年越嶲斯叟反攻圍任回及太守李謙遣其征南費黑救之 咸和元年夏斯叟破 二年謙移郡民於蜀 三年冬驤死追贈相國謚曰漢獻王壽以喪還拜珣征北梁州代壽以班行撫軍將軍修晉壽軍屯 五年拜壽都督中外諸軍大將軍中護軍西夷校尉錄尚書總統如驤 冬壽率征南費黑征東任邵伐巴東至建平監軍毋丘奧退保宜都 六年春壽還

遣任邵屯巴雄以子越為車騎住廣漢 秋壽伐陰平

冬城涪縣 七年秋壽南征寧州以費黑為司馬與

邵攀等為前軍由南廣入又別遣任回子調由越嶲

冬十月壽黑至朱提朱提太守董炳固城寧州刺史尹

奉遣建寧太守霍彪大姓爨深等助炳時壽已圍城欲

逆拒之黑曰料城中食少霍彪等雖至齎糧不多宜令

人入城共消其穀猶嫌其少何緣拒之彪等皆入城城

久不下壽欲急攻之黑諫曰南道險俗好反亂宜必待

其詐勇已困但當日月制之全軍取勝以求有餘溷牢之物何足汲汲也壽必欲戰果不利乃悉以軍事任黑八年春正月炳彪等出降威震十三郡三月刺史尹奉舉州委質遷奉於蜀壽領寧州南夷初平威禁甚肅後轉凌掠民秋建寧州民毛衍羅屯等反殺太守邵攀牂柯太守謝恕舉郡為晉壽破之九年春分寧州

置交州以霍彪為寧州建寧麋深為交州刺史封壽建寧王張駿使參軍傅穎治中張淳遺雄書勸去尊號



稱藩於晉雄引見謂曰吾過為士大夫所推然本無心  
於帝王也貴州將令行河沙常所希冀進思共為晉室  
元功之臣退思共為守藩之將掃除氛埃以康帝宇而  
晉室陵遲德聲不振引領東望有年月矣會獲來貺情  
鈞閣至有何已已穎淳以為然使聘相繼 已郡嘗告  
急云有東軍雄曰吾常慮石勒跋扈侵逼瑯琊以為耿  
耿不圖乃能舉軍使人欣然雄之雅談多如此類 三  
月壽還夏六月癸亥雄疾病卒時年六十一偽諡曰武

帝廟稱太宗凡自立三十年 冬十二月丙寅葬成都  
墓號安都陵也

班字世文蕩第四子也少見養於雄年十六立為太子  
好學愛士每觀書傳謂其師友天水文夔隴西董融等  
曰吾見周景王太子丕吳太子孫登文章鑒  
識超然卓絕未嘗不有慙色何古人之難及乎進止周  
旋勤於咨問但性輕躁失在田獵 甲子襲位珥來奔  
喪勸遣雄子越還江陽而欲令期代已知北事班以未

葬不許遣珣還涪 冬十月癸亥期越殺班於臨次并  
殺班仲兄領軍都弟珣奔晉期偽謚班曰宸太子壽追  
謚曰哀皇帝子幽顯為期所殺班兄弟五人皆兵死四  
人無後珣在晉歷已郡襄陽宜都太守龍驤將軍永和  
三年從征西於山陽戰死也 期字世運雄第四子也母  
冉賤雄妻任養為子少攻學問有容觀雄時令諸子各  
募合部曲多者纔得數百人而期獨得千餘人為安東  
將軍雄亡越自江陽來赴喪兄弟怏怏既以班非雄所

生又慮玠不利已與兄越密謀圖班太史令韓約上言  
宮室有陰謀兵氣戒在親戚班不悟遂因夜哭越殺班  
期自立以越為相國與壽並錄尚書事進壽大都督徙  
封漢王使討玠於涪封越建寧王以仲兄霸為中領軍  
鎮南弟保鎮西西夷校尉汶山太守從兄始征東代越  
皆大將軍 玠走即拜壽梁州知北事 咸熙元年春  
正月立妻閭氏為后下赦改元玉恒 秋以司隸景騫  
為尚書令征南費黑為司隸班舅羅演為僕射 舅羅

演與漢王相天水上官澹謀襲期立班子幽謀泄殺澹  
并誅班母羅瑤子礪稚妻咎二年忌從子載多才藝託  
他事誅之而霸保皆暴病死於是大臣自疑骨肉不相  
親而期志益廣忽慢父時公卿政刑失錯 四年夏四  
月壽自涪還襲期假以誅越騫為言越請散財募士格  
戰期謂壽不自薄不許既誅越騫初廢期為邛都縣公  
五月乃殺期及誅李始等殺兄弟十餘人期死時年  
二十四謚曰幽王 五年徙其妻子於越雋勢又使人

就越雋誅其子 壽字武考有幹局愛尚學義志度少  
殊於諸子雄奇之自代父為將志在功名故東征南伐  
每有効事雄疾病侍疾左右左右侍臣造雄顧命寄託  
於壽 期之殺班也李始初欲附壽圖共討期壽不敢  
始怒說期取壽憚李珣在北欲藉壽討之故不許壽既受  
漢封北伐珣告以去就利害假道故珣得由巴順水東  
下吳壽雖伐珣鎮涪歲終當入朝覲常自危嫌輒造漢  
中守將張才急書告方外寇警 咸康二年冬北入漢

中破走司馬勲壽見期越兄弟十餘人年方壯大而手下有強兵懼不自全數聘命高士巴西龔壯壯雖不應恐見害不得已數見壽時岷山崩江水竭壽緣劉向之言而惡之每謀壯以自安之術壯之父及叔皆為特所殺欲假手報讎未有其由因說立事何如舍小從大以危易安開國裂土長為諸侯名高桓文勲流百代矣壽從之陰與長史略陽羅恒巴西解思明共謀據成都為晉稱藩會養弟攸徙成都病還死道中乃佯言越藥殺

之又詐造妹婿任調書言期越當廢壽以惑羣下羣下信之乃誓文武許賞城中資財得數千人南攻成都子勢為開門內應遂獲期越誅其宗族十餘人兵入虜掠民家奸淫雄公主及李氏諸婦多所殘害數日迺定恒與思明及李奕王利等勸壽稱鎮西將軍益州牧成都王以壯為長史告下又勸令送期於晉任調與司馬蔡興侍中李艷及張烈等勸壽自立壽亦生心遂背思明所陳之計稱漢皇帝尊父驤曰獻帝母咎氏曰太后下



赦改元漢興以恒為尚書令思明為廣漢太守任調鎮  
北梁州知東羌校尉李奕鎮西西夷校尉更代諸郡及  
卿佐皆用宿人及已參佐省交州以從子權為鎮南  
夷寧州於是成都諸李子弟無復秉兵馬形勢者雄時  
舊臣及六郡人皆斥廢也 秋七月李奕從兄乾與大  
臣合謀欲廢壽壽懼使子廣與大臣盟要為兄弟進李  
闕為征東荊州移鎮巴郡 八月天連陰雨禾稼傷損  
百姓飢疫草莽臣龔壯上封事曰臣聞陰德必有陽報

故于公理獄高門待封伏惟獻皇帝寬仁厚惠宥罪甚  
衆靈德洪洽誕鍾陛下陛下天性忠篤受遺建節志齊  
周霍誠貫神明而志緒違理顛覆顧命管蔡既興讒諛  
滋蔓大義滅親撥亂濟危上指星辰昭告天地歆血明  
衆舉國稱藩天應人悅白魚登舟霆震助威烈風順義  
神誠允暢日月光明而論者未喻權時定制淫雨汜漬  
垂向百日禾稼損傷加之飢疫百姓愁望或者天以監  
示陛下又前日之舉止以救禍陛下至心本無大圖而

今久不變天下之人誰復分明知陛下本心者哉且玄  
宮之讖難知而盟誓顧違一旦疆場有急內外騷動不  
可不深思長久之策永為子孫之計也愚謂宜遵前盟  
誓結援吳會以親天子彼必崇重封國歷世雖降階一  
等永為靈德宗廟相承福祉無窮君臣銘勲於上生民  
寧息於下通天下之高理弘信慎之美義垂拱南面歌  
詩興禮上與彭韋爭美下與齊晉抗德豈不休哉論者  
或言二州人附晉必榮六郡人事之不便昔豫州入蜀

荆楚人貴公孫述時流民康濟及漢征蜀殘民大半鍾  
鄧之役放兵大掠誰復別楚蜀者乎論者或不達安固  
之基惜其名位在昔諸侯自有卿相司徒司空宋魯皆  
然及漢藩王亦有丞相今義歸彼但當崇重豈當減削  
昔劉氏郡守令長方仕州郡者國亡主易故也今日義  
舉主榮臣賴寧可同日而論也論者又謂臣當為法正  
陛下覆臣如天養臣如地恣臣所安至於名榮漢晉不  
處臣復何為當侔法正論者或言晉家必責質任及徵

兵伐胡何以應之案晉不煩尺兵一國來附威卷四海  
廣地萬里何任之責胡之在北亦此之憂今平居有東  
北之虞縱令徵兵但援漢川猶差二門耳臣託附深重  
忘疲病之穢實感殊遇冀以微言少補明時常懼殞歿  
不寫愚心辜負恩顧謹進恹恹伏願罪戮壽不悅然拘  
前言秘藏之 九月僕射任顏雄妻弟也謀反誅并殺  
雄子約等 五年春二月晉將伐巴郡獲李閔閔恭子  
也初受許自牛鞞以東土斷與閔執政者以為不可乃

止復不益兵故覆沒閼弟豔以是怨故與朝右有隙是時壽疾病恒思明等復議奉晉計尋巴郡破壽以為附晉晉當以兵威故不能自斷遂輟計三月拜李奕鎮

東代閼夏建寧太守孟彥率州人縛寧州刺史霍彪於晉舉建寧為晉遣右將軍李位都討之時權在越雋秋又遣尚書廣漢李攄為御史入南中攄祖毅晉故寧州刺史以向與南人有舊故遣之攄從兄演自越雋上書勸壽歸正返本釋帝稱王壽怒殺之車騎將軍王

韜為參軍

石車騎將軍王韜為參軍九字前後文不相屬不知記何事也今仍舊本存此九字於後

以待

改晉康帝建元元年壽卒勢立改元太和太史令韓

皓上言熒惑守心乃宗廟不修之譴勢乃更命祀成始

祖太宗皆謂之漢勢之弟大將軍廣以勢無子求為太弟勢不許馬當解思明固請許之勢疑與廣有謀收當

思明斬之廣自殺思明被收歎曰國之不亡以我數人在也今其殆矣思明有智略敢諫諍馬當素得人心及其死士民無不哀之冬李奕自晉壽舉兵反單騎突門

門者射殺衆潰勢大赦境內改年嘉寧勢驕淫不恤國

事中外離心蜀土無獠

魯皓切西  
南夷別族

至是始徙山出自巴

至犍為梓潼布滿山谷大為民患加以飢饉境內蕭條

三年春二月桓溫伐蜀軍至青衣勢大發兵遣咎堅等

將之

咎子感  
切姓也

自山陽趣合水諸將欲設伏江南以待晉

兵咎堅不從引兵自江北鴛鴦碕渡向犍為

碕渠壽切  
曲岸曰碕

溫自將步卒直指成都咎堅至犍為乃知與溫異道還

自沙頭津濟比至溫已軍於成都之十里陌堅衆自潰



勢率衆出戰于笮橋

笮音昨

中書監王嘏散騎常侍常璩

勸勢降勢乃夜開東門走至葭萌使散騎常侍王幼送降文於溫勢至建康封歸義侯

李氏自起事至亡六世四十七年正僭號四十三年蜀中亦有怪異期時有狗豕交木冬榮勢時涪陵民樂氏婦頭上生角長三寸凡三截之又有民馬氏婦妊身兒脇下生其母無恙兒亦長育有馬生駒一頭二身相著六月一牡一牝又有天雨血於江南數畝許李漢家春

米自臼中跳出遽斂於箕中又跳出寫於簞中又跳出有猿居鳥巢至城下地仍震又連生毛其天譴不能詳也

譔曰特流乘釁險害雄能推亡固存遭皇極不建遇其時與期倡為禍階而壽勢終之詩所謂亂離瘼矣奚其適歸者也長老傳譙周讖曰廣漢北有大賊曰流曰特攻難得歲在亥宮自相賊終如其記先識預覩何異古人乎歷觀前世偽僭之徒縱毒虐劉未有如茲每惟殷

人丘墟之歎賈生過秦之論亡國破家其監不遠矣

按常璩華陽國志目錄第九卷及序志皆云述李特  
雄期壽勢志則勢固有志也今諸本皆無此意者傳  
寫脫漏因循不錄遂失之爾今本諸通鑑所述參以  
載記所書續成勢志用補其闕以俟後之博洽君子  
云又史載散騎常侍常璩實勸李勢降桓溫璩必作  
志者因續記此云

華陽國志卷九